

2
448



ИМОМ БУХОРИЙДАН ҚИРК ҲАДИС



ЎЗБЕКИСТОН МУСУЛМОНЛАРИ ИДОРАСИ
ЎЗБЕКИСТОН ХАЛКАРО ИСЛОМ АКАДЕМИЯСИ
ИСЛОМШУНОСЛИК ИЛМИЙ-ТАДҚИҚОТ МАРКАЗИ

ИМОМ БУХОРИЙДАН ҚИРҚ ҲАДИС



NASHRIYOT

MUHAMMAD AL-БАРЫ NOMIDAGI TOSHKENT AXBOROT TEXNOLOGIYALARI UNIVERSITETI
383385

AXBOROT-RESURS MARKAZI

Тошкент
2018

УЎК 28
КБК 86.38
Б 97

Буюк муҳаддис Имом Бухорийнинг “Ал-жомеъ ас-саҳиҳ” асари Пайғамбаримиз Муҳаммад (соллаллоҳу алайҳи ва саллам)нинг айтган гаплари, килган ишлари, фаолиятлари хакидаги хабарларни жамлаган дунёдаги энг ишончли китоб хисобланади. Ушбу ри-солада ана шу китобдаги ҳадислардан ёшлиар учун мўлжалланган турли мавзудаги кирқ ҳадис тўпланган.

Имом Бухорийдан кирқ ҳадис [Матн] / нашрга тайёрловчи Д. Муродов. - Тошкент : MOVAROUNNAHR, 2018. - 48 б.

Масъул мұхаррір:
Зоҳиджон Исломов

Нашрға тайёрловчи:
Дониёр Муродов

*Вазирлар Маҳкамаси ҳузуридаги Дин ишлари бўйича қў-
митанинг 2018 йил 7 июлдаги 4218-сонли хуносаси асосида
нашрға тайёрланди.*

ISBN 978-9943-12-545-2

© Мовароунаҳр, 2018

ИМОМ БУХОРИЙНИНГ ҲАЁТИ ВА ИЛМИЙ ИЖОДИ

Муҳаддиснинг тўлиқ исми Муҳаммад ибн Исмоил ибн Иброҳим ибн Муғира ибн Бардизбаҳ Абу Абдуллоҳ Жуъфий. Муҳаддис, тарихчи, ҳадис илмида мўминлар амири.

Имом Бухорий ҳижрий 194 йил шаввол ойининг 13-сида, жума куни (милодий 810 йил 20 июлда) Бухоро шаҳрида зиёли оиласалардан бирида дунёга келган. Имом Бухорий ёшлиқ пайтиданоқ илмга чанқоқ бўлган. Айниқса, ҳадис илмига бўлган иштиёқи чексиз эди. У илк бора ҳадис илмини ўз онасидан олган. Маълумотларга кўра, Имом Бухорийнинг онаси ўз даврининг оқила аёлларидан бўлган. Алломанинг отаси Исмоил ҳам илмли кишилардан саналган, тижорат билан ҳам шуғулланган. Бироқ Имом Бухорийнинг отаси унинг ёшлиқ пайтидаёт вафот этади.

Манбаларда ёзилишича, Муҳаммад ибн Исмоил ёшлиқ пайтида кўзи ожизлик касалита чалинган. Лекин онасининг дуо ва илтижолари туфайли соғайиб кетган. Бу ҳақда адабиётларда бундай ёзилган: «Имом Бухорийнинг онаси тушида Иброҳим пайғамбарни кўриб, у зот Имом Бухорийнинг онасига “Эй аёл, Аллоҳ сенинг кўз ёшларинг ва дуоларинг сабаб ўғлингга кўзининг нурини қайтарди”,

деган». Имом Бухорийнинг кўзи ёшлигига нима сабабдан ожиз бўлиб қолгани ҳақида аниқ маълумотлар учрамайди.

Имом Бухорий илмга чанқоқлиги сабабли қисқа вақт ичида оммавий билимлардан ўз улушкини тўла-тўқис олишга эришади. Бухорий ҳадисларни ёдлашни 10 ёшидан бошлайди. Имом Бухорий ҳадис илмидан даставвал Бухорода, ўз даврининг таникли мұҳаддиси Дохилийдан сабоқ олади. Ҳадисларни ўрганиш бўйича ушбу олим ташкил этган мактабнинг шуҳрати кенг тарқалган эди, Имом Бухорий ҳам бошқалар қатори унинг дарсларида мунтазам иштирок этган. Шу тариқа Имом Бухорий 16 ёшгача ўз Ватани тарихини ва Мовароуннардаги машҳур уламолардан ҳадис илмини чуқур ўрганди. Шунинг баробарида у ҳадис илми бўйича устозлари билан илмий баҳслар олиб борди. Айни вақтда машҳур бўлган Абдуллоҳ ибн Муборак ва Вакиъ ибн Жарроҳ каби олимларнинг тўпламларини ёд олган. Унинг устозлари ва замондошлари бу ёш йигитнинг илмга бўлган чанқоқлигини кўриб тажжуфда қолишарди.

Имом Бухорий 821 йилдан бошлаб ҳадислар ўрганишни бошлади ва 210/826 йилгача Ватанидаги машҳур мұҳаддислардан ҳадис илми борасида сабоқлар олди.

Имом Бухорий илм талабида ислом минтақа-

сининг катта қисми бўйлаб сафар қилган, оламга донғи кетган йирик илмий марказларни айланиб чиққан. У ўзи ҳақида: «Шом ва Мисрга бордим. Жазирага икки марта, Басрага эса тўрт марта бордим. Ҳижозда етти йил яшадим. Куфа ва Бағдодга муҳаддислар билан неча марта кирганимнинг ҳисобини ҳам билмайман», деб ёзади.

Имом Бухорийдан ривоят қилишларича, у «Мен минг нафар ёки ундан ҳам кўпроқ шайхлардан ҳадис ёздим ва уларнинг ҳар биридан ўн минг, балки ундан ҳам зиёдроқ ҳадис ёздим», деган.

Ривоят қилинишича, Имом Бухорийнинг сафарлари давомида унинг шогирдлари сони тобора ортиб боради. Унинг шогирдларидан бири Абу Абдуллоҳ Фирабройнинг ёзишича: «Имом Бухорийнинг дарсларида жуда кўп машҳур таниқли муҳаддис олимлар иштирок этарди. Улар орасида Абу Исо Термизий, Абу Абдураҳмон Насойи, Муслим ибн Ҳажжож, Абу Хузайма сингари машҳур алломалар бор эди. Ҳали ёш йигит бўлган Имом Бухорийдан ҳадисларни эшитиб ўрганиш учун ер юзининг турли бурчакларидан ёшлари улут минглаб муҳаддислар келарди».

У илмий изланишлари давомида 100 минг сахих ҳадис ва 200 минг сахих бўлмаган ҳадисларни ёд олган. Имом Бухорийнинг котиби унинг ҳадис илмига бўлган иштиёқини тавсифлаб бундай ёзади:

«Агар Имом Бухорий билан сафарга чиқсак, йўл ярмида кечга яқин бирорта хонадонда тунаш учун қолар эдик. Ўша кечаси Имом Бухорий 15 мартадан 20 марта гача ўрнидан туриб, шам ёкиб, ёдига тушган ҳадисни ёзиб, кейин яна ётарди».

Имом Бухорий ўзининг изходий изланишлари самараси орқали келажак авлодга қимматли дурдан асарлар мерос қолдирган. У ёзган асарларнинг сони йигирмадан ортиқдир. Улар сирасига «Ал-жомеъ ас-саҳих», «Ал-адаб ал-муфрад», «Ат-тариҳ ал-қаби्र», «Ат-тариҳ ал-авсат», «Ат-тариҳ ас-сағиր», «Биррул волидайн», «Китобул куно», «Китобул илал», «Асмои ас-саҳоба» ва бошқаларни киритиш мумкин. Афсуски, бу асарларнинг қўпи юртимизда йўқ. Ҳозир юртимизда Имом Бухорийнинг «Ал-жомеъ ас-саҳих» ва «Ал-адаб ал-муфрад», «Ат-тариҳ ас-сағири», «Ас-салоту ҳалф ал-имом» ва бошқа асарлари бор.

Муҳаммад ибн Исмоил Бухорий 870 йилнинг шаввол ойида шанба кунига ўтар кечаси хуфтон намози пайтида вафот этади. Шанба куни пешин намозидан сўнг Самарқанднинг Хартанг қишлоғида дафн этилади. Имом Бухорий 62 йил умр кўрган.

ИМОМ БУХОРИЙНИНГ «АЛ-ЖОМЕЪ АС-САҲИХ» АСАРИДАН 40 ҲАДИС

Ният

1. Мўминлар амири Абу Ҳафс Умар ибн Ҳаттоб (розияллоҳу анҳу)дан ривоят қилинади: Мен Расулуллоҳ (соллаллоҳу алайҳи ва саллам)нинг бундай деяётгандарини эшитдим: **«Амаллар фақатгина ниятлар билан эътиборлидир ва ҳар бир киши учун унинг ният қилган нарса-сигина берилади...»**

Изоҳ: Банданинг амаллари қалби, тили ва бадани орқали амалга оширилади. Ушбу ҳадисда инсон қалби орқали бўладиган нарса тўлиқ ёритилган. Чунки дин ички ва ташқи амаллардан иборат. Ният ички амал ҳисобланиб, қалб билан бўлади. Инсоннинг зоҳирида кўринадигани харакатли амаллардир. Одам диний ва дунёвий ишларни амалга оширганда, унинг ниятига қараб, ё савоб ёки гуноҳ берилади. Масалан, инсон илм олади, бу илм олишидан мақсад дунё

ва дини учун бўлса, илмга ва савобга эришади. Аммо илм олишдан мақсад бойлик топиш бўлса, илмга эришади, бироқ савоб олмайди. Шундай экан, инсоннинг нияти яхши ва холис бўлиши, амаллари ҳам шунга мос келиши лозим.

Яхши ишларга савобнинг кўпайтириб берилиши

2. Абдуллоҳ ибн Аббос (розияллоҳу анху)дан ривоят қилинади: Расулуллоҳ (соллаллоҳу алайхи ва саллам) Аллоҳ таолодан ривоят қилиб дедилар: «Аллоҳ таоло яхшиликларни ҳам, ёмонликларни ҳам ёзди, сўнгра уларни баён қилиб берди. Ким бир яхшиликни кўнглига тугса-ю, уни қилмаса, Аллоҳ таоло Ўз хузурида уни комил яхшилик сифатида ёзиб қўяди. Агар бир яхшиликни кўнглига тугиб, уни амалга ҳам оширса, Аллоҳ таоло уни Ўз хузурида ўн яхшилиқдан етти юз баробаргача – беҳад зиёдалар билан ёзиб қўяди. Агар банда бир ёмонликни кўнглига тугса-ю, уни қилмаса, Аллоҳ таоло ўз хузурида уни комил яхшилик сифатида ёзиб қўяди. Агар бир ёмонликни кўнглига тугиб, уни амалга оширса, Аллоҳ таоло уни битта ёмонлик сифатида ёзиб қўяди».

Изоҳ: Бу ҳадис ҳам Аллоҳ олдида, ҳам жамият олдида инсоннинг мавқеини оширишга қара-

тилган. Кишининг исломи қанчалик гўзал, имони комил ва қилган иши қай даражада ўрнига тушганига қараб, унинг амали етти юз баробар зиёдалари билан ўзига қайтарилади. Ким бир яхши амални кўнглига туғиб, сўнг уни қилмаса ҳам, ана шу қатъий қарори Аллоҳ таоло хузурида комил яхшилик сифатида ёзиб қўйилади. Чунки яхшилик қилишга бел боғламоқ ижобий ишларнинг муқаддимаси ва сабабчисидир. Яхшилик сабабчиси ҳам яхшилик саналади. Натижада инсон фақат яхшилик қилишга ҳаракат қиласди. Аллоҳ таоло бандасини дилидан ўтган ёмон нијати учун азобламайди. Дилидаги ёмон ниятлар амалда кўринсагина, уларга жазо беради. Мусулмон киши ҳамиша бир яхши ниятни дилига туғиб юрсин. Эҳтимол, у хайрли ниятлари учун мўл-кўл ажр-савоблар олар. Албатта, мўминлар қодир бўлган чоғларида хайрли ниятларини амалга оширишга ўзларини шай тутмоқлари, ўргатмоқлари лозим. Ихлосли бандалар адо этган хайрли ишлари учун ҳам, тарк қилган маъсиятлари учун ҳам қалбларидағи ихлослари туфайли савоб оладилар. Ихлоснинг улканлигига қараб бериладиган савоблар ҳам зиёда бўлади. Бу Аллоҳ таолонинг мўмин бандаларига раҳмати кенг, мағфирати улуғ ва ажр-мукофоти беҳисоб эканини кўрсатади.

Ислом арконлари

3. Абдуллоҳ ибн Умар (розияллоҳу анҳумо) дан ривоят қилинади: Расулуллоҳ (соллаллоҳу алайҳи ва саллам) дедилар: «Ислом беш нарса устига барпо қилингандир: Аллоҳдан ўзга илоҳ йўқ ва Мұхаммад (соллаллоҳу алайҳи ва саллам) Аллоҳнинг Расули, деб гувоҳлик бериш; намозни барпо қилиш; зақотни адо этиш; Байтуллоҳни ҳаж қилиш; Рамазон ойида рўза тутиш».

Изоҳ: Исломнинг асосий қоидаларини ўзида жамлаган ушбу ҳадис мўминларга Ислом динини ва унинг асосларини танитади. Дин арконлари тартибини баён қилиб беради. Улар:

1. Аллоҳдан ўзга илоҳ йўқ ва Мұхаммад (соллаллоҳу алайҳи ва саллам) Аллоҳнинг Расули, деб гувоҳлик бериш орқали киши мусулмон бўлади;
2. Намозни доимо ўз вақтида адо қилиш бу – баданий ибодат ҳисобланади;
3. Агар моли муайян микдорга етган бўлса, камбағалларга закот беради, бу молиявий ибодатdir;
4. Имкониятга эга киши умрида бир маротаба Байтуллоҳни ҳаж қилиши;
5. Ҳар йили Рамазон ойида рўза тутиш. Рўза киши қалбининг покланишига, унинг руҳан юксалишига ва жисмонан соғлом юришига сабаб бўладиган ибодатdir.

Бидъат рад этилади

4. Уммул мўминин Ойша (розияллоҳу анҳо) дан ривоят қилинади: Расулуллоҳ (соллаллоҳу алайҳи ва саллам) дедилар: «Кимки динимизда асли йўқ бўлган нарсани пайдо қилса, у албатта рад этилади».

Изоҳ: Ушбу ҳадис динда бўлмаган ишларни диндан деб амалиётга жорий қилинишига қарши айтилган. Чунки диндаги барча амаллар инсон бажариши учун енгилдир. Бироқ баъзи одамлар ўзлари бирор ишни ўйлаб топиб, диндан деб одамларга ўргатганлар, мана шундай асли динда кўрсатилмаган амаллар бидъат ҳисобланиб, улар рад этилади. Шунинг учун динда кейинчалик пайдо қилинган амалларнинг Аллоҳ шариатига хилоф бўлганлари ёмон бидъат ва очиқ залолатдир.

Ҳалол ва ҳаром

5. Абу Абдуллоҳ Нўймон ибн Башир (розияллоҳу анҳу)дан ривоят: «Мен Расулуллоҳ (соллаллоҳу алайҳи ва саллам)нинг бундай деганларини эшитдим: «Дарҳақиқат, ҳалол нарсалар аниқдир, ҳаром нарсалар ҳам аниқдир. Иккисининг ўртасида эса, шубҳали нарсалар ҳам борки, кўпчилик уларни билмайди. Кимки шундай шубҳали нарсалардан ўзини

эҳтиёт қилса, динини ҳам, номус-обрўсими ҳам покиза асраб қолади. Бунинг мисоли бирорвнинг қўргони атрофида сурувни ўтлатиб юрган чўпонга ўхшайди. У қўйларининг бехосдан ўша қўрғонга кириб кетишидан омонда бўлмагани сингари, шубҳали нарсалардан ўзини эҳтиёт қилмаган киши кейинчалик ҳаромга ҳам аралашиб қолади. Огоҳ бўлинг, ҳар бир подшонинг қўрғони бўлади. Огоҳ бўлинг, Аллоҳнинг қўрғони Унинг ҳаром қилган нарсаларидир. Огоҳ бўлинг, жасадда бир парча гўшт борки, агар у соғлом бўлса, бутун жасад соғ-саломат бўлади. Агар у айниса, жасаднинг қолган қисми ҳам бузилади. Огоҳ бўлинг, у парча гўшт қалбидир».

Изоҳ: Нарсалар уч қисмга бўлинади: ҳалоллиги очик-ойдин бўлган нарсалар, масалан, нон емоқ, гапирмоқ, юрмоқ каби; ҳаромлиги очик-ойдин бўлган нарсалар, масалан, ароқ ичиш, зино қилиш каби; на ҳалоллиги ва на ҳаромлиги аниқ бўлган шубҳали нарсалар. Уларнинг ҳукмини кўпчилик билмайди. Уламолар эса, оят-ҳадис ҳужжати билан ёки қиёс орқали уларнинг ҳукмини айтадилар. Демак, бирон нарсанинг ҳалол ёки ҳаром эканида шубҳа туғилса ва бу борада оят, ҳадисдан ва ижмодан далил топилмаса, мужтаҳид олим шу мавзуда

ижтиҳод қилиши ва шаръий далил билан ўша ноаниқ нарсани ҳалолга ёки ҳаромга нисбатлаб бериши лозим бўлади.

Бу ҳадис мўмин кишини ҳалолга интилиб, ҳаромдан узоклашишга, шубҳали нарсаларни тарк қилишга, дини ва обрўсини пок сақлашга, одамларда ёмон гумон уйғотиши мумкин бўлган амаллардан ўзини йироқ тутишга ва гуноҳларга аралашиб қолмасликка ундайди. Шунингдек, маънавий қувватларни кучайтиришга, нафсни ислоҳ қилишга чақиради ҳамда ҳаром ишларга олиб борадиган баҳоналарнинг олдини олишга ундайди.

Қалбнинг саломат бўлиши – хиёнат, адоват, ҳасад, ҳасислик, баҳиллик, кибр, ўзгалар устидан кулиш, риё, макр, ҳирс, таъмагирлик, тақдирдан норози бўлиш каби ички иллатлардан саломат бўлиш билангина ҳосил бўлади.

Буйруқларни имкон қадар бажарии

6. Абу Ҳурайра Абдурраҳмон ибн Сахр (розијаллоҳу анху)дан ривоят қилинади: Мен Расулуллоҳ (соллаллоҳу алайҳи ва саллам)нинг бундай деганларини эшийтдим: «Сизларни нимадан қайтарган бўлсам, ундан йироқ бўлинглар. Нимага буюрган бўлсам, имкон қадар ўша нарсани бажаринглар. Сизлардан аввал ўт-

ган қавмларни ҳалок қилган нарса уларнинг ўз пайғамбарларига кўп савол бераверишлари ва қўрсатмаларига хилоф иш қилишлари бўлган».

Изоҳ: Бу ҳадисда кишига буюрилган ишни қилиб, қайтарилиган ишдан тийилиши айтилган. Ортиқча савол ва бўлмаган нарсалар ҳақида сўраш мумкин эмаслигини ўргатади. Шунингдек, кўп савол берувчиларга ўша ишни қила олмай, унинг тескарисини қилиб кетишларидан огоҳлантиради. Шариат буйруқларини англаб, уларга амал қилишга интилиш ва беҳуда саволлардан халос бўлиш лозим. Расулуллоҳдан аввалги пайғамбарлар умматининг адашиб кетишларига ортиқча савол бериб, кейин унга амал қилмасликлари сабаб бўлгани уқтирилмоқда. Демак, сўраётган киши савол беришда ҳам ўзига яраша одобга амал қилиши ҳамда жавобни эшитгандан сўнг, унга амал қилиши лозим бўлади. Мусулмон киши ўзи ёки жамият учун зарур бўлган нарсага ва унга амал қилиши учун савол беради.

Мол-мулк, жсон ва обру дахлсизлиги

7. Абу Бакра (розияллоҳу анху) Расулуллоҳ (соллаллоҳу алайҳи ва саллам)ни эслаб, Расулуллоҳ бундай деганлар деди: «Ушбу кун ва

ої хурмати, бир-бирингизнинг мол-мулкингизни таламанглар, қонингиз ва обрўйингизни тўкманглар. Гапимни эшитганлар эшитмаганларга етказсинлар!»

Изоҳ: Мусулмоннинг молини тортиб олиш, қонини ва обрўсими тўкиш гуноҳ экани таъкидланмоқда. Бу ерда бошқа одамни обрўсими тўкиш ва молини тортиб олиш одам ўлдириш билан бир қаторда кўрилиши унинг гуноҳи катта эканига далил бўлади. Шунинг учун бирорни ўлдиришдан ёки молини ўғрилаб олишдан қанчалар эҳтиёт бўлинса, унинг обрўсими тўкишдан ҳам шунча эҳтиёт бўлиш зарур. Шунингдек, бу алоҳида таъкидланган ва бу ҳадисни бошқалар ҳам билиши учун эшитмаганларга етказиш уқтирилган. Демак, бир одам бошқанинг обрўсими тўкиши ҳаром ҳисобланади. Одамларни ғийбат қилиб, обрўсими тўккан дўзахда азобланиши ҳақида бошқа ҳадислар ҳам бор.

Аллоҳ ёмон кўрган ишлар

8. Муғийра (розияллоҳу анҳу) ривоят қиласиди: «Пайғамбар (соллаллоҳу алайҳи ва саллам): «**Аллоҳ таоло сизларга оналарингизга оқ бўлишни ҳаром қилиб, мумсик (хасис) бўлишни ҳамда гўдак қизларни тириклайин ерга кў**

мишни (Исломдан олдин шундай одат бўлган) ман қилди, шунингдек, миш-миш гапларни тарқатиш, кўп савол бериш ва молни зое қилишни сизлар учун ёмон кўрди», дедилар.

Изоҳ: Бу ҳадис Аллоҳ ёмон кўрган сифатларни зикр қилиб ўтмоқда. Ҳар қандай ҳолатда ҳам ота-онага оқ бўлмаслик лозим. Кишининг ўз қиз зурриётини ўлдириши жуда оғир жиноятлардан экани уқтирилмоқда. Шунингдек, турли асоссиз гапларни текширмасдан тарқатиш мумкин эмас. Кишининг бошқаларга кўп савол бериши, айниқса, мансаб эгалари, устоз, имом ва шунга ўхшаш кишиларга ўзи ва бошқалар учун фойдасиз савол бериши натижасида кўплаб нохушликлар келиб чиқиши кузатилгани учун ҳам бундан қайтарилган. Маблағни ҳам ўз ўрнига сарфламай, исроф қилиш жамиятдаги мувозанатни бузади, инсонлар ўртасида фитна чиқишига сабаб бўлади. Бу эса, уларнинг бирдамлигини кетказади.

Катта гуноҳлар


9. Убайдуллоҳ ибн Абу Бакр ривоят қиласи: «Мен Анас ибн Моликдан эшитдимки, Расуллоро (соллаллоҳу алайҳи ва саллам) катта гуноҳлар ҳақида гапирибдилар ёки одамлар ўзлари Жаноб Расуллороҳдан катта гуноҳлар тўғрисида сўрашибди. Шунда Пайғамбаримиз (соллал-

лоҳу алайҳи ва саллам): «Аллоҳ таолога ширк келтириш, ўзини-ўзи ўлдириш ва ота-онага оқ бўлиш», дебдилар. Кейин яна: «Энг катта гуноҳларни айтайми? Бу тухмат қилишдир», деб қўшиб қўйдилар. У Зот: «Ёлғон гувоҳлик беришдир!» деб айтган бўлишлари ҳам мумкин, чунки Шуъба: «У киши: “Ёлғон гувоҳлик беришдир!” деган бўлишлари керак, деб ўйлайман», дейди.

Изоҳ: Бу ҳадисда инсоннинг дунёси ва охирати учун энг хатарли бўлган ишлар, яъни катта гуноҳлар ҳақида гапирилган. Аллоҳга ширк келтириш, яъни Аллоҳнинг шериги бор деб ҳисоблаш гуноҳларнинг энг каттаси ҳисобланади. Шунингдек, ота-онага оқ бўлиш ва ўзини ўлдириш, яъни суиқасд ҳам улкан гуноҳлар экани таъкидланган. Буларга қўшимча равишда ёлғон гувоҳлик бериш ҳам катта гуноҳлардан экани тушунтирилган. Ёлғон гувоҳлик (тухмат) ҳам жамиятнинг бўлинишига, нафрат ва адватнинг пайдо бўлинишига олиб борувчи йўлдир. Одам ўзи билмайдиган, кўрмаган, эшитмаган нарсасига гувоҳ бўлиши ёлғонларнинг каттаси ҳисобланади.

Мусулмон кишининг сифатлари

10. Расулуллоҳ (соллаллоҳу алайхи ва саллам) нинг ходимлари Абу Ҳамза Анас ибн Молик (ро-



зияллоху анҳу)дан ривоят қилинади: Пайғамбар (соллаллоху алайҳи ва саллам) дедилар: «**Сизларнинг бироғингиз то ўзига яхши кўрган нарсани биродарига ҳам яхши кўрмагунига қадар имонли бўла олмайди».**

Изоҳ: Бу ҳадис инсонларни ўзаро аҳил-иноқ қилиш билан улар аҳволини ўнглаш Ислом дини катта эътибор берадиган муҳим амал эканини кўрсатмоқда. Киши худбинлик, ҳасад ва адоварту нафрат каби иллатлардан холи бўлмас экан, унинг қалбida имон мустаҳкам қарор топмайди. Комил имон эгаси бўлмоқ учун инсон ўзига хоҳлаган соғлик, тинчлик, яхши ҳаёт кечириш, Аллоҳнинг розилигига эришишдек улуг неъматларни биродарига ҳам соғинмоғи лозим. Инсон ўзи учун хоҳлайдиган хайрли, ҳалол нарсаларни ва тоат-ибодат амалларини биродарига ҳам соғиниши, ўзининг бошига тушишини истамаган ёмонлик ва маъсиятдан биродарларининг ҳам омон юришини тиламоғи лозим. Ўзи учун бироғлардан инсоф-адолат талаб қилганидек, биродарига нисбатан ҳам ҳамишаadolатли бўлиб, унинг ҳақ-хуқуқларини тўла адо этиши имондан экани уқтирилмоқда. Бошқа ҳадисда: «Мусулмон мусулмонга биродар бўлиб, ўзаро зулм қилмайди, бир-бирининг тинчлигини бузмайди. Кимки биродарининг оғирини енгил

қилса, Аллоҳ таоло унинг мушқулини осон қиласи!» дейилган.

Қўшина яхшилик

11. Абу Ҳурайра (розияллоҳу анху)дан ривоят қилинади: Расулуллоҳ (соллаллоҳу алайҳи ва саллам) дедилар: «**Ким Аллоҳга ва охират кунига имон келтирган бўлса, яхши сўзларни гапирсин ёки сукут сақласин. Ким Аллоҳга ва охират кунига имон келтирган бўлса, қўшнисини иззат-икром қиласин. Ким Аллоҳга ва охират кунига имон келтирган бўлса, меҳмонини иззат-икром қиласин».**

Изоҳ: Фақат хайрли сўзларни сўзлаб, беҳуда гаплардан ўзини тиймоқ имон комиллигидандир. Кўп гапириш ҳалокатга олиб боради. Тилни беҳуда гаплардан сақламоқ нажотга бошлайди. Зеро, беҳуда гап-сўз орқасидан кимгадир зиён етказиб қўйиш ёки фисқу фасод урчишига йўл очилиши ҳеч гап эмас. Ана унда киши Парвардигори ғазабига дучор бўлади. Шу боис фақат хайрли сўзларни сўзлаш комил имон белгиларидан саналади. Қўшни билан яхши муносабатда бўлиш зарур, унга озор бериш Исломда ҳаромдир. Меҳмонни иззат-икром қилиш кишининг имони ва исломи гўзаллигидандир. Мазкур ҳадис мазмунини тўлиқ англаб, унга тўла-тўкис

амал килмоқ жуда аҳамиятли. Чунки у қалбларни бир-бирига яқинлаштиради, ўртадан гина, адоватни, нафратни кўтаради. Ҳаммамиз кимгайдир кўшнимиз. Кўпчилик одамлар меҳмон ёки мезбон бўлишади. Агар ҳар ким ўз қўшнисини иззат-икром қилса, ҳар бир мезбон меҳмоннинг ҳурматини жойига қўядиган бўлса, жамият фаровонлашади, ўзаро муҳаббат, дўстлик қарор топади. Айниқса, ҳар бир инсон сўзлаш одобига риоя қилиб, факат яхши сўзларни сўзласа ёки сукут қилса, яхшиликлар зиёда бўлади.

Fазаб қилма!

12. Абу Хурайра (розияллоҳу анху)дан ривоят қилинади: «Бир киши Пайғамбар (соллаллоҳу алайҳи ва саллам)га: “Менга насиҳат қилинг”, деди. “**Фазаб қилма!**” дедилар Пайғамбар (соллаллоҳу алайҳи ва саллам). Ҳалиги одам илтимосини бир неча бор такрорлади. “**Фазаб қилма!**” дедилар Расулуллоҳ (соллаллоҳу алайҳи ва саллам)».

Изоҳ: Мусулмон гўзал ахлоклар билан сифатланган, ҳилму ҳаё ила зийнатланган бўлади. Тавозе либосини кийган инсон ўзгаларга раҳмдиллик билан муомала қиласди. У бирорлар оғирини ўз елкасига олади, озор-азиятларга сабр қиласди, жазолашга қодир бўла туриб дилозорни афв эта-

ди, ҳамиша ғазабини боса олади... Хуллас, улуғ сифатлар ва гўзал ахлоқларни ўзида мужассам этади. Саҳобий дунёю охирагат яхшилигига етишиш умидида Расулуллоҳ (соллаллоҳу алайҳи ва саллам)дан насиҳат сўраганида, Пайғамбар (соллаллоҳу алайҳи ва саллам) бир оғиз лўнда ибора билан унга насиҳат қилдилар: “**Ғазаб қилма!**” Мазкур ибора ҳар бир хайр-яхшиликка даҳлдор ва ёмонликка тўсик бўлган насиҳат хисобланади. Ҳалимлик ва босиқлик дунёю охирагат саодатига бошлайди. Ғазаб ёмонликларнинг бошидир, ҳалимлик эса, кучлилик белгисидир. Ғазаб ҳалокатли оқибатларга олиб боради. Инсон ғазаб устида килиб қўйган ишларига ҳам жавоб беради.

Йўлнинг ҳақи

13. Абу Саид Худрий (розияллоҳу анҳу) ривоят қиласиди: «Пайғамбар (соллаллоҳу алайҳи ва саллам): “**Кўчаларда** (бекорчиликдан эзмаланиб гаплашиб ўтиromoқдан) **қочинглар!**” дедилар. Одамлар: “**Ё Расулуллоҳ, бунга одатланиб қолганмиз**”, дейишди. Жаноб Расулуллоҳ: “**Агар ўтиришларингиз лозим бўлса, у ҳолда йўлнинг ҳақини адo қилинглар!**” дедилар. Одамлар: “**Йўл ҳақи нима?**” дейишди. Жаноб Расулуллоҳ: “**Кўзни тийиш, азият етказмас-**

лик, ўтаётганлар саломига алик олиш, яхшиликка чақириш ва ёмонликдан қайтарышдир”, деб жавоб қилдилар.

Изоҳ: Расулуллоҳ (соллаллоҳу алайҳи ва саллам) одамларни кўчада бекорчи ўтиришдан қайтардилар. Унинг ўрнига фойдали ишлар билан шуғулланиш лозим. Агар бу холатга тушиб, кўчада ўтиришга тўғри келса, унинг одобига риоя қилиш керак бўлади. Кўчадан ўтган-кетганга термулмай, уларни ғийбат қилмай, уларни муҳокама қилмай, салом берса алик олиб, ўтаётган кишини яхшиликка буюриб, ёмонликдан қайтариши лозим бўлади. Бу ҳадис бекорчиликдан қайтармоқда.

Чин мусулмон

14. Абдуллоҳ ибн Амр (розияллоҳу анҳу) ривоят қиласи: «Расулуллоҳ (соллаллоҳу алайҳи ва саллам): “Мусулмон – тили ва қўли билан бошқа мусулмонларга озор бермаган одамдир, муҳожир – Аллоҳ таоло такиқлаган нарсалардан ўзини тия билган одамдир!” дедилар».

Изоҳ: Бу ҳадисда диннинг буюк одоби баён қилинмоқда. Ҳақиқий мўмин, чин мусулмон ҳеч қачон ноҳақ бировга озор бермайди. Унинг имони бундай қилишга йўл қўймайди. Агар ўзи истамаган тарзда бировга озор бериб қўйса, виж-

дона қийналиб, ўзини қўярга жой тополмайди.

Мусулмонлик даъвосини қилиб, одамларни ўлдирадиган кимсалар диннинг бу таълимотини унутиб қўйган. Уларнинг бу иши динини бошқаларга ёмон қилиб кўрсатишдан бошқа нарса эмас.

Ўз жонига қасд қилиши имон заифлигидандир

Собит ибн Захҳок (розияллоҳу анху)дан ривоят қилинади: Пайғамбар (соллаллоҳу алайҳи ва саллам): “Ким ўзини бирор нарса билан ўлдирса, жаҳаннам оловида ўша нарса билан азобланади”, дедилар.

Изоҳ: Ўз жонига қасд қилиш энг катта гуноҳлардандир. Чунки ўз жонига қасд қилиш илоҳий неъматларга ношуқрлик, ҳаётдан воз кечишидир. Инсон ким бўлишидан қатъи назар, унинг бошига турли синовлар тушиши табиий. Баъзилар ҳаёт қийинчиликлари сабабли ўзларини ҳалок этиб, гўё шу билан азоблардан биратўла кутуламиз, деб ўйлашади. Бу ўйлари шайтон васвасаси, жуда катта хатодир.

Инсон ҳеч қачон Аллоҳнинг раҳматидан ноумид бўлмаслиги, бошига мушкул иш тушганда ваҳима босиб, шошилиб, ҳеч ким билан маслаҳатлашмай, нотўғри қарор қабул қиласлиги лозим.

Савоблар тўла берилади

15. Абу Сайд Худрий (розияллоҳу анху) риво-

ят қиласи: «Бир бадавий Расулуллоҳ (соллаллоҳу алайхі ва саллам)дан ҳижрат ҳакида сўради. Жаноб Расулуллоҳ: “Шўринг курсин, ҳижрат қилиш мушкул иш, сенинг туяларинг борми?” деб айтдилар. У “Ҳа бор”, деди. Жаноб Расулуллоҳ: “Улар учун закот бериб турасанми?” деб сўрадилар. У: “Ҳа закот бериб тураман”, деб жавоб қилди. Жаноб Расулуллоҳ: “Денгизлар ортида туриб ҳам амали солиҳ қиласвер. Аллоҳ таоло қилган солиҳ амалларинг савобини бекаму кўст беради”, дедилар».

Изоҳ: Мусулмон киши қаерда бўлса ҳам мусулмон. Мусулмонлигини билдириш учун маълум бир жойга кўчиб бориши шарт эмас. Инсон қаерда бўлса ҳам, тўғри ибодат қиласа, ибодати Аллоҳ таолонинг хузурида қабул бўлаверади.

Одоб

16. Абу Масъуд Уқба ибн Амр Ансорий Бадрий (розияллоҳу анҳу)дан ривоят қилинади: Расулуллоҳ (соллаллоҳу алайхі ва саллам) дедилар: «Одамлар орасида аввалги пайғамбарлардан сақланиб қолган бир гап шуки: агар уялмасанг, хоҳлаган ишингни қил!»

Изоҳ: Кишиларни ҳаёли бўлишга даъват этиш уларни барча маъсият ва ёмонликлардан қайтарувчи чақириқдир. Ҳаё инсонларга хуш келувчи хайрли хислат ҳамдир. Одамлар ҳаёдан маҳрум

бўлишни нуқсон ва айб деб биладилар. Шунингдек, у имоннинг комиллигини билдирувчи хусусият саналади. Аслида Ислом дини ўзининг умумахкомлари ва кўрсатмалари билан эзгулик ва ҳақни қарор топтирувчи, маломатли ишларни тарк қилишга чақиравчи диндир. Бу ҳадис Ислом асосларидан биридир. Яъни шариат буюрган во жиб ва мандуб амалларни бажармасликдан ҳаё қилинади. Шариат қайтарган ҳаром ва макруҳ ишларни эса бажаришдан ҳаё қилинади. Мубоҳ амаллар эса, уларни бажаришдан ҳам, тарк қилишдан ҳам ҳаё қилиш мумкин. Ҳадисдан бир неча маъно тушунилади: 1. Ҳадисдаги буйруқ феъли таҳдид-ваъидни ифодалайди. Унда ҳадис маъноси қуидагича шарҳланади: Агар сенда ҳаё бўлмаса, хоҳлаган ишингни қиласер. Албатта, Аллоҳ таоло сени қаттиқ жазолайди! 2. Ҳадисдаги буйруқ ҳабар маъносини ифодалайди. Яъни, беҳаё кимсалар хаёлларига нима келса, қиласерадилар. Чунки ҳаё инсонни қабиҳ одатлардан тўсиб туради. Ҳаёсиз маҳлуклар эса бузуклик ва тубанлик балчигига ботадилар.

Дараҳт экши савоби

17. Анас ибн Молик (розияллоҳу анҳу) ривоят қиласи: «Пайғамбар (соллаллоҳу алайҳи ва саллам): “Бир мусулмон дараҳт эккан бўл-

са-ю, унинг мевасидан одамлар ёки ҳайвонлар тановул қилган бўлса, унга садақа берганилик савоби ёзилади!” деб айтдилар».

Изоҳ: Бу ҳадис инсоннинг ҳар бир қилган яхши ишига садақа ёзилиши ва ҳатто, эккан дарахтидан одамлар еса, ўшангага ҳам савоб бўлиши айтилмоқда. Демак, жамиятда инсонларга фойдаси тегадиган ишларни қилишга интилиш яхши ишлардан ҳисобланади.

Расулуллоҳ (соллаллоҳу алайҳи ва саллам) хулқлари

18. Анас ибн Молик (розияллоҳу анҳу) шундай дейди: «Расулуллоҳ (соллаллоҳу алайҳи ва саллам) сўконғич ҳам, бадхулқ ҳам, қарғовчи ҳам эмас эдилар. Бирортамизга танбеҳ бермоқчи бўлсалар: “Пешонанг тупроққа теккур!” дер эдилар».

Изоҳ: Бу ҳадисда Пайғамбар (соллаллоҳу алайҳи ва саллам)нинг хулқлари қандай бўлгани ҳақида кетмоқда. У киши одамларни лаънатлаб, сўкиб, қарғаб юрадиган бўлмаганлари айтилган. Ҳатто кофирларни ҳам сўкмаганлар. Бирор кишига “пешонанг тупроққа теккур” дейишлари, пешонанг саждага тегсин, яъни намоз ўқигур, дейиш ҳисобланган. Инсон намоз билан яхшиликка эришади.

Савобли ишлар

19. Абу Ҳурайра (розияллоху анху)дан риво-ят қилинади: Расулуллоҳ (соллаллоху алайхи ва саллам) дедилар: «**Инсонлардаги жами аъзолар учун Қуёш чиқадиган ҳар бир кунда садақа мавжуд: икки киши ўртасида адолат қилишинг – садақа.** Бироннинг уловга ми-нишига ёрдам бериб, уни чиқариб қўйишинг ёки нарсасини олиб беришинг – садақа. Яхши сўз – садақа. Йўлдан азиятли нарсани олиб ташлашинг ҳам садақадир».

Изоҳ: Инсон жисмидаги бўғинлар батартиб ва кўркам суратда яратилгани, уларнинг турли вазифаларни бажара олиши бугун ҳеч кимга сир эмас. Шу боис, Расулуллоҳ (соллаллоху алайхи ва саллам) танадаги аъзоларни алоҳида тилга олдилар. Суяклар, бўғинлар ва асаб толаларининг соғломлиги жуда катта неъматдир. Бунинг учун Аллоҳга шукроналар айтиш керак. Неъматлар бу тана ҳамда қулоқ ва кўз саломатлиги-дир. Аллоҳ таоло бандалардан бу неъматларни нималарга ишлатганларини сўрайди. Шунинг учун тананинг шукрини адо этиш лозим. Садақа фақат мол-давлат доирасида чекланмайди. Талашиб-тортишиб, хусуматлашиб, аразлашиб ажрашиб кетган икки киши ўртасини ислоҳ қилиш ҳам, биродарига уловга чиқишида ёрдамлашиб

ҳам садақа экан. Бошқа одамга айтилган яхши сүз ҳам садақа. Юришга халал берадиган нарсаларни йўлдан олиб ташлаш ҳам садақа сифатида Аллоҳ ҳузурида ёзилиб бориши айтилмоқда. Мусулмон кишининг ҳар бир қилган амалига савоб ёзилиши алоҳида тъкидланмоқда. Натижада киши доимо яхши ишларни қилиб юришга ҳаракат қиласди.

Аллоҳ мұхаббатига сабаб амал

20. Абу Ҳурайра (розияллоҳу анҳу)дан ривоят қилинади: Расулуллоҳ (соллаллоҳу алайҳи ва саллам) дедилар: «**Аллоҳ таоло айтади: Кимдаким Менинг дўстим билан адоватлашса, Мен унга уруш эълон қиласман. Бандам Мен унинг зиммасига фарз этган амаллардан кўра суюклироқ нарса билан Менга қурбат-яқинлик ҳосил қиласмаган. Бандам Менга нафл ибодатлар билан тобора яқинлашаверганидан, ҳатто уни яхши кўриб қоласман. Агар уни яхши кўрсам, Мен унинг эшитадиган қулоги, кўрадиган кўзи, ушлайдиган қўли ва юрадиган оёғи бўласман. Агар Мендан сўраса, албатта, унга бераман. Агар Мендан паноҳ тиласа, албатта, уни паноҳимга оламан».**

Изоҳ: Бу қудсий ҳадис бўлиб, маъноси Аллоҳдан, сўзи Расулуллоҳ (соллаллоҳу алайҳи ва сал-

лам)дандир. Ушбу ҳадисда Аллоҳ ўз бандалари орасидан дўст тутганлари бор эканини кўрсатади. Аллоҳ таоло эса ўз дўстларидан меҳр-муҳаббатини дариг тутмайди ва уларга озор етказган кимсаларга ғазаб қиласди. Шунингдек, ушбу ҳадис кимлар дунё ва охиратда Аллоҳнинг суюкли дўстлари эканини баён этади. Аллоҳ таолонинг дўстлари ҳамиша Парвардигор ибодатида қоим турувчи ва ёлғиз Унга ихлос қўювчи мўминлардир. Аллоҳ таоло учун суюкли бўлган энг афзал амал фарзларни адо этишдир. Фарз ибодатлари билан бирга нафл ибодатларни адо этиб, ҳаром ва макруҳлардан ўзини сақловчи инсон яхшиликларда ўзиб кетувчи деб қаралади. Унинг марта-баси Аллоҳ валийларининг олий даражаси ҳисобланади. Банда Унинг буйруғига мувофиқ ҳаратат қиласди, Аллоҳни деб гапиради, Аллоҳни деб эшигади, Аллоҳни деб қарайди ва Аллоҳни деб ушлайди. Банданинг барча иши Аллоҳни розилиги учун бўлади. Бундай кишиларнинг қилган дуолари доимо ижобат бўлади.

Илм

21. Расулуллоҳ (соллаллоҳу алайҳи ва саллам) мажлисда ўтирган эдилар. Уч киши кириб келди. Улардан иккиси Расулуллоҳга юзланиб, тўхтаб қолди, бири эса қайтиб кетди. Қолган икки ки-

шидан бири даврадаги бўш ўринни кўриб, ўша ерга бориб ўтирди. Иккинчиси ҳам даврадан четроққа аста келиб ўтирди. Расулуллоҳ (соллаллоҳу алайҳи ва саллам) сўзлаб бўлгач, дедилар: «**Сизларга уч киши тўғрисида гапириб берайми? Биринчиси, Аллоҳдан бошпана сўради, Аллоҳ унга бошпана берди, иккинчиси эса** (одамлар орасига кириб ўтиришдан) **уялди, Аллоҳ таоло ҳам (уни азоблашга) уялди. Аммо учинчиси мажлисдан юз ўгиради. Аллоҳ таоло ҳам ундан юз ўгиради.**»

Изоҳ: Бу ҳадисда Расулуллоҳ (соллаллоҳу алайҳи ва саллам)нинг одобларидан бири кўринмокда. Уч кишининг айнан ўзини кўрсатмасдан, ишора қилмоқдалар. У зот даврларида масжид барча вазифаларни адo этадиган жой бўлган: масжид, мадраса, маслаҳатхона ва ҳоказо. Расулуллоҳ (соллаллоҳу алайҳи ва саллам) масжидда илмдан гапириб турган вақтларида уч киши кириб келади. Шунда улардан бири одамларнинг орасига кириб ўтиради. Расулуллоҳ (соллаллоҳу алайҳи ва саллам) бу одамни илмга бўлган интилишини эътиборга олиб, Аллоҳдан бошпана сўради, Аллоҳ ҳам унга бошпана берди, деб айтдилар. Иккинчиси ҳам чиқиб кетмай, одамлардан четроққа ўтиради. Аллоҳ бу кишини ҳам савобсиз қолдирмайди. Аммо учинчи одам эса

илем мажлисидан чиқиб кетгани учун Аллоҳдан юз ўғирди, демокдалар. Демак, илем мажлисидан қочиш Аллоҳдан юз ўгириш билан баробар ҳисобланади. Ўқувчи ва талабаларнинг дарсдан қочишини ҳам илем мажлисидан қочишга тенг дейиш мумкин. Мусулмон одам илем мажлисида қатнашиши зарурлиги алоҳида таъкидланмоқда.

Олимларнинг ганимат экани

22. Абдуллоҳ ибн Амр (розияллоҳу анху): «Расулуллоҳ (соллаллоҳу алайҳи ва саллам) нинг: “Албатта, Аллоҳ илемни одамлардан бир суғуриш ила суғуриб олмайди. Лекин илемни уламоларнинг жонини олиш билан кеткизади. Токи олим қолмаганды одамлар жоҳил бошлиқларни тутадилар. Шунда ўшалардан сўралади. Улар эса илмсиз равишда фатво берадилар. Шу билан ўзлари ҳам залолатга кетадилар, ўзгаларни ҳам залолатга кетказадилар”, деганларини эшитганман», деб айтган.

Изоҳ: Аллоҳ илемни бирданига йўқ қилмаслиги, балки олимларнинг вафот этишлари билан секин-аста йўқ бўлиб кетиши айтилмоқда. Олимнинг ўрнига бошқаси чиқмагандан кейин илем ҳам йўқолиб боради. Шунда одамлар илмсиз одамларни ўзларига фатво берадиган қилиб сайлайдилар ва улар илмсиз «олимлар»идан

сўраганларида нотўғри фатво бера бошлайдилар. Бу билан ўзларини ва одамларни залолатга бошлайдилар. Шунинг учун илм олишга интилиш, олимларни ҳурмат қилиш лозим.

Ислом осонлик дини

23. Абу Бурда оталари ҳамда боболаридан нақл қиласидилар: «Пайғамбар (соллаллоҳу алайҳи ва саллам) уни (яъни боболарини) ва Муоз ибн Жабални (Яманга) юбораётиб: «**Осонлаштиинглар, қийинлаштирманглар, жалб қилинглар, бездирманглар ва ҳамжиҳат бўлинглар!**» деб тайинладилар».

Изоҳ: Исломда бирор масала ечимида ёки ҳукм чиқаришда, умуман олганда, ҳар бир нарсада осон тарафини олиш, қийин томонини олмаслик лозим. Бу шариат доирасидан чикмаслик шарти билан амалга оширилади. Осон томонини олиш Ислом динининг асосий қоидасидир. Бошқа ҳадиси шарифларда айтилишича, Пайғамбаримиз (соллаллоҳу алайҳи ва саллам)га икки нарса орасидан бирини танлаб олиш ихтиёри берилса, осон томонини олгарлар. У зот мана шу ҳадисни ҳар бир саҳобийга қайта-қайта тайинлаганлар.

Ислом ҳақида гапирилганда доимо яхшиликларни, хушхабар бўладиган нарсаларни гапи-

риш лозим. Нафратни келтирадиган, чўчита-диган, кўнглини қолдирадиган гап-сўзларни ишлатмаслик керак. Шунинг учун одамларга диндан гапирадиганлар бунга алоҳида эътибор беришлари лозим. Кишиларга диннинг осонлиги, икки дунё баҳт-саодатига етказиши башоратини бериш мақсадга мувофиқ ҳисобланади.

Ота-онага яхшилик қилиши

24. Абу Ҳурайра (розияллоҳу анҳу) ривоят қилади: «Бир одам Расулуллоҳ (соллаллоҳу алайҳи ва саллам)нинг ҳузурларига келиб: “Ё Расулуллоҳ, менинг яхши муомала қилишимга ким ҳақлироқ?” деб сўради. Жаноб Расулуллоҳ: “**Онанг!**” дедилар. У: “Яна ким?” деб сўради. Жаноб Расулуллоҳ: “**Онанг!**” дедилар. У: “Яна ким?” деди. Жаноб Расулуллоҳ: “**Онанг!**” дедилар. У: “Яна ким?” деб сўради. Жаноб Расулуллоҳ (бу сафар): “**Отанг!**” деб жавоб қилдилар».

Изоҳ: Киши учун бу дунёда унинг қиласидиган яхшиликларига энг аввал онаси ҳақдор экани айтилмоқда. Чунки она ҳомиладор, туғиши, эмизиши, ўстириш вақтида отадан кўпроқ меҳнат қиласиди. Бу давр она учун энг қийин давр ҳисобланади. Шунинг учун Расулуллоҳ (соллаллоҳу алайҳи ва саллам) ота-онадан қай бирлари бу яхшиликка ҳақлироқ дейилса, ушбу ҳадиси шарифга бино-

ан, она, деган жавобни берганлар. Болани дунёга келтириш, парваришилаш ишларида она кўпроқ мashaққат чекади. Шунинг эътиборидан онанинг ҳақи отанинг ҳақидан муқаддам қўйилган.

Бироннинг ота-онасини сўкиши ўз ота-онасини сўкиши билан баробар

25. Абдуллоҳ ибн Амр (розияллоҳу анху) ривоят қилади: «Расулуллоҳ (соллаллоҳу алайҳи ва саллам): “Одам қиладиган катта гуноҳлардан бири ота-онасини ҳақорат қилишдир!” дедилар. Шунда: “Ё Расулуллоҳ, одам ўз ота-онасини қандай қилиб ҳақорат қилиши мумкин?!” дейишди. Жаноб Расулуллоҳ: “**Бироннинг ота-онасини сўккан одам ўз ота-онасини ҳақорат қилган бўлади**”, деб жавоб қилдилар».

Изоҳ: Инсон бошқа бир инсонни ёки ота-онасини сўкиши ва ҳақорат қилиши мумкин эмас. Балки бундай ҳолатда ўзини ёки ўз ота-онасини сўккан ва ҳақорат қилган билан баробар бўлиши айтилмоқда. Шунинг учун киши бошқа одамни сўкишдан сақланиши, ўзига назар солиши лозим.

Мехр кўрсатмаган меҳр кўрмайди

26. Абу Ҳурайра (розияллоҳу анху) ривоят қиладилар: «Расулуллоҳ (соллаллоҳу алайҳи ва

саллам) Ҳазрат Алиниңг ўғиллари Ҳасанни ўпдилар. Шунда ўша ерда ўтирган Ақраъ ибн Ҳобис Таймий: “Менинг ўнта болам бор, уларнинг бирортасини ҳам ўпмаганман”, деди. Расулуллоҳ (соллаллоҳу алайҳи ва саллам) унга бир нигоҳ ташлаб қўйдилар-да, сўнг: “**Қим меҳрибонлик қилмас экан, меҳрибонлик кўрмайди!**” дедилар».

Изоҳ: Бу ҳадисда болаларни эркалаш, ўпиш, ўйнатиш, уларга болаларча муносабатда бўлиш лозимлиги уқтирилган. Бу эса болага катта таъсир ўтказувчи омил ҳисобланади. Чунончи, бола меҳрли бўлиб ўсади. Акс ҳолда, меҳр кўрмаган боладан катта бўлганда турли салбий нарсаларни кутиш мумкин.

Кўшиничилик

27. Ойша (розияллоҳу анҳо) ривоят қиласди: «Ё Расулуллоҳ, менинг икки қўшним бор, ҳадя улашишни уларнинг қай биридан бошлай?» дедим. Жаноб Расулуллоҳ: «Эшиги эшигинга яқинидан», деб жавоб қилдилар.

Изоҳ: Мўминлар онаси Ойша (розияллоҳу анҳо) барча муслима аёлларга ибрагт бўлганлар. Расулуллоҳ (соллоллоҳу алайҳи ва саллам)нинг қўшнига яхшилик қилиш ҳақидаги ҳадисларини эшитибоқ, унга амал қилишга интилганлар.

Үзларига ва барча умматта дарс бўлиши учун Расулуллоҳ (соллоллоҳу алайҳи ва саллам)га ушбу савол билан мурожаат қилганлар. Ушбу ҳадисдан қўшнилардан ҳадя ва совғалар беришга энг ҳақдори эшиги яқин қўшни экани тушунилади.

Яхши гумонда бўлиш

28. Абу Ҳурайра (розияллоҳу анҳу) ривоят қилади: «Расулуллоҳ (соллаллоҳу алайҳи ва саллам): “Гумонсираманг, гумондан ёлғонроқ сўз йўқдир, бадгумонлик қилиб, тирноқ остидан кир қидирманглар, жосуслик қилманглар, ўзаро нафратланиб бир-бирингизга ёв қараш қилманглар, ўзаро урушманглар ва Аллоҳ таолонинг ўзаро иноқ, биродар бандалари бўлинглар!” дедилар».

Изоҳ: Бу ҳам жамиятни ислоҳ қилишга қаратилган энг фойдали ҳадислардан биридир. Ушбу ҳадисда ҳам энг гўзал хулқларга тарғиб қилинмоқда. Демак, бошқа инсонлар борасида ёмон гумонга бормаслик лозим. Инсон кўп ҳолатларда гумонли нарсаларга дуч келса, асосан, ёмон ва салбий жиҳатларини ўйлайди, етиб келган хабарнинг ёки эшитган гапларидан яхши томонларини ҳам қидириш лозим. Шунингдек, тирноқ остидан кир қидириш, гап пойлаш, жосуслик қилиш, ҳасад қилиш,

аразлашиш, гина қилиш ва нафратланиш ҳолатларидан ҳам узоқ бўлиш мақсадга мувофиқ. Ҳадис-нинг охирида: “Аллоҳ таолонинг солиҳ бандалари бўлинглар”, деган сўз ким шу ишларни қилмасдан ака-ука бўлиб ҳаёт кечирса, солиҳ инсонлар сафида бўлишини англатади.

Ноҳақлик

29. Сайд ибн Зайд (розияллоҳу анху) деди: «Расулуллоҳ (соллаллоҳу алайҳи ва саллам): “Кимки ўзининг ҳаки бўлмаган ердан бир қаричини тортиб олса, қиёмат куни ўша ер етти қават Ергача унинг устига юкланади”, деганлар».

Изоҳ: Ушбу ҳадиси шарифда ўзганинг мулкига тажовуз қилиш улкан гуноҳ экани, унга бериладиган жазо ҳам жуда оғир экани айтилмоқда. Расулуллоҳ (соллаллоҳу алайҳи ва саллам)нинг бир қарич деб айтишлари тортиб олинган мулкнинг катта ёки кичиклиги аҳамиятсиз эканини билдиради. Бир қарич бўлса ҳам, у ўзганинг мулки. Унга бериладиган жазо оғирлигича қолаверади.

Зулм

30. Ибн Умар (розияллоҳу анху) ривоят қилади: «Расулуллоҳ (соллаллоҳу алайҳи ва саллам):

“Бир аёл бир мушук туфайли дўзахга кирди. У мушукни боғлаб қўйиб, на овқат берарди ва на уни ер ҳашаротларидан ейиши учун ўз ҳолига қўйиб юборар эди”, дедилар».

Изоҳ: Мусулмон киши амалларни паст сана маслиги лозим. Чунки эътиборга олинмаган арзимас иш ҳам улкан фалокатларга сабаб бўлиши мумкин. Ҳадисда келган аёл кичкинагина мушукка раҳм қилмагани, унга зулм қилгани учун дўзахий бўлди. Зеро, раҳм қилмаганга раҳм қилинмайди.

Ҳалол касб қилиши

31. Абу Ҳурайра (розияллоҳу анҳу) ривоят қиласиди: «Расулуллоҳ (соллаллоҳу алайҳи ва саллам): “Сизларнинг бирортангиз бир қучоқ ўтин йиғиб, уни сотиб тирикчилик қилиши бирор берса ҳам, бермаса ҳам (тиланчилик қилиб) сўрашидан яхшидир”, дедилар».

Изоҳ: Ҳалол меҳнат, гарчи у тилга олишга арзимас бўлса ҳам, сарғайиб бирордан тиланчилик қилишдан афзалдир. Олувчи қўл доим пастда бўлади. Қолаверса, ҳалол меҳнат учун Аллоҳ таоло бандасига улкан ажрларни беради. Тиланчилик қилган инсонга эса фақирлик эшиклари ни очиб қўяди. Расулуллоҳ (соллаллоҳу алайҳи ва саллам) кишиларни тиланчилик қилишдан

қайтариб, ҳалол мөхнат билан тирикчилик қилишга ўргатганлар.

Ҳалоллик баракадир

32. Миқдом ибн Маъдикариб (розияллоху анху) айтади: «Пайғамбар (соллаллоху алайҳи ва саллам): “Озиқ-овқатларингизни (тўғри) ўлчанглар, (Аллоҳ таоло) сизга барака ато этади!” дедилар».

Изоҳ: Расулуллоҳ (соллаллоху алайҳи ва саллам) тижорат билан шуғулланувчиларга улкан дарс бермоқдалар. Бу ҳам бўлса, барака тўғриликдадир. Нотўғри ўлчаб, одамларнинг молини ботил йўл билан еганлар ўзларининг хаёлида фойда кўрдим деб ўйлайдилар. Лекин бунинг зарари бу дунёда тижоратлари бебарака бўлиши бўлса, охиратда аламли азобга дучор бўладилар. Тарозидан уриш ҳам ёлғоннинг бир тури. Бошқа ҳадисда эса «Ёлғончилар биздан эмас», дейилган.

Мунофиқнинг сифатлари

33. Абдуллоҳ ибн Умар (розияллоху анху) ривоят қиласиди: Пайғамбар (соллаллоху алайҳи ва саллам) бундай дедилар: «Кимда тўрт сифат мавжуд бўлса, у то ундан қутулмагунча, мунофиқдир. Агар ушбу тўрт сифат-

дан бири кимда бўлса, уни тарк этмагунича (унда) мунофиқликдан бир сифат бор деб ҳисобланади, (улар): сўзласа, ёлғон сўзлайди, ваъда қилса, вафо қилмайди, ахдлашса, аҳдини бузади, хусуматлашса, бузғончилик қиласди».

Изоҳ: Бу ҳадисда Пайғамбаримиз (соллаллоҳу алайҳи ва саллам) мўминга бегона бўлган тўртта салбий сифатни баён қилмоқдалар. Агар уларга диққат билан эътибор берсак, учта сифат ёлғончиликка бориб тақалади. Чунки ваъдага вафо қилмаслик, аҳдини бузиш ҳам ёлғоннинг бир тури ҳисобланади. Тўртинчи сифат, хусуматлашиб қолган кишига кек сақлаш, нотўғри йўллар билан адоват сақлаш мусулмоннинг сифатларига кирмаслиги таъкидланган.

Демак, ҳар бир мўмин бу разил сифатлардан йироқда бўлиши, бундай сифатларга олиб борадиган йўлга яқинлашмаслиги шарт.

Одамларнинг энг ёмони

34. Абу Ҳурайра (розияллоҳу анҳу) ривоят қиласди: «Расулуллоҳ (соллаллоҳу алайҳи ва саллам): “Одамларнинг энг ёмони иккиюзламачи киши бўлиб, у бирорларга бир юзини, бошқа бирорларга эса иккинчи юзини җаратади”, деб айтганларини эшитдим».

Изоҳ: Иккиюзламачилик билан имон бир қалбда жамланмайди. Албатта, бири иккинчи сини суриб чиқаради. Шунинг учун имони бор, ҳақиқий мўмин кишида бундай разил сифат бўлмайди. Мўмин киши сўзида, ҳаракатида, юриш туришида ростгўй бўлади. У ҳеч қачон бировга бир сўз, бошқа бировга иккинчи бошқа сўзни айтиб юрмайди. Пайғамбаримиз (соллаллоҳу алайҳи ва саллам) иккиюзламачини одамларнинг энг ёмони дедилар. Чунки иккиюзламачи ер юзида фасод ишларни тарқатиб, одамларни бир-бирига душман қилиш ва жамиятдаги ҳамжиҳатликка путур етказишга ҳаракат қиласди.

Дўзах аҳли сифати

35. Ҳориса ибн Ваҳб Хузоий (розияллоҳу анҳу) ривоят қиласди: «Расулуллоҳ (соллаллоҳу алайҳи ва саллам): “Дўзах аҳли кимлар эканини ҳам айтайми? Ҳар бир қўпол, мутакаббир, беканоат ва димоғдор одам дўзах аҳлидир”, дедилар».

Изоҳ: Жаннатга кириш, дўзахдан кутулиб қолиш мусулмон кишининг энг катта орзусидир. Дўзах аҳли эса қўпол, гердайган, кибрли, бировнинг ҳақини поймол қиласиган, қаноатсиз, сабрсиз ва золим бўлади. Мусулмон киши бундай сифатлардан узокда бўлиши лозим.

Бойлик

36. Ибн Аббос (розияллоҳу анҳу) ривоят қиласиди: «Пайғамбар (соллаллоҳу алайҳи ва саллам): “Икки неъмат мавжуд бўлиб, кўпчилик одамлар уларнинг қадрига етмайдилар. Бу соғлик ва бўш вақтдир”, дер эдилар».

Изоҳ: Бу ҳадисда зикр қилинган икки неъмат, яъни соғлиқ ва бўш вақтнинг қадрига етганимизда қўп ютуқларга эришган бўлардик. Ҳадисда айтилганидек, бу икки неъматнинг қадрига кўпчилик етмайди. Бошқа ҳадисда беш нарсани ғанимат билиш кераклигини баён қилиб Пайғамбаримиз (соллаллоҳу алайҳи ва саллам) бундай деганлар:

«Беш нарсани беш нарсадан олдин ғанимат бил:

- 1) йигитлик пайтингни кексайишишингдан олдин;
- 2) соғломлигингни касал бўлишишингдан олдин;
- 3) бойлигингни камбағал бўлишишингдан олдин;
- 4) бўш вақтингни машғул бўлиб қолишдан олдин;
- 5) ҳаёtingни ўлишингдан олдин».

Одам ҳаёти давомида турли қийинчиликларни кўради. Кимдир савдода, кимдир дехқончиликда, яна кимдир бошқа нарсада. Шуларнинг ичига энг катта заар бу соғлик ва бўш вақтнинг қадрига етмаслик зараридир.

Мусулмон одам соғлиққа заар нарсаларни истеъмол қилишдан ва вақтини беҳуда ўтказишдан сақланади.

Қаноат

37. Абу Хурайра (розияллоҳу анху) ривоят қилади: Расулуллоҳ (соллаллоҳу алайҳи ва саллам): «**Мол-дунёси кўп одам бадавлат эмас, балки нафси тўқ одам бадавлатдир!**» дедилар.

Изоҳ: Дарҳақиқат, ҳақиқий бойлик қалб бойлигидир. Агар қалб оч бўлса, қўлингизда бутун дунё бойлиги бўлса ҳам, камдек туюлаверади. Энг ёмон томони шундаки, қалб очлиги инсонни Аллоҳнинг ибодатидан ҳам тўсиб қўяди. Чунки у қанча топса ҳам, қанча йигса ҳам, унинг кўзи бойликдан тўймайди ва шу бойликни топишим керак деб, на моз ва ибодатдан йирок бўлиб юради. Қалби тўқ одам эса Аллоҳ берганига қаноат қилиб, зиммасидаги бандалик масъулиятини бажаради. Пайғамбаримиз (соллаллоҳу алайҳи ва саллам) қалби очларга хитоб қилиб бундай деган эдилар: «Агар одам боласининг бир водий мол-дунёси бўлса, яна ўшанча бўлишини истайди. Одам боласининг кўзини фақатгина тупроқ тўлдиради».

Куфр иш

38. Абдуллоҳ ибн Масъуд (розияллоҳу анху) ривоят қиласи: Пайғамбар (соллаллоҳу алайҳи ва саллам): «Мусулмонни сўкиш – фисқ, ўлдирмоқ – куфрдир!» дедилар.

Изоҳ: Бу ҳадисда мусулмоннинг қадри Аллоҳ наздида нақадар улкан экани баён қилинмоқда. Мусулмонни сўккан одам фосиқ бўлиб қолар экан. Ўлдирган киши эса куфр амални қилган бўлади.

Аллоҳ мусулмонни ноҳақ ўлдирганларни қоралаб Куръонда бундай марҳамат қилди: «Кимда-ким қасддан бир мўминни ўлдирса, унинг жазоси жаҳанинамда абадий қолишдир. Яна унга Аллоҳ ғазаб қилгай, лаънатлагай ва унга улкан азобни тайёрлаб қўйгай» (*Нисо сураси, 93-оят*).

Ҳадисда ҳозирги кундаги террор гурухларининг Ислом номидан иш кўраётгани ва айбизз кишиларни ўлдиришлари куфр иши экани баён қилинган.

Раҳбарга итоат

39. Ибн Аббос (розияллоҳу анху) ривоят қиласи: «Пайғамбар (соллаллоҳу алайҳи ва саллам): “Кимки ўз амирининг (раҳбар) бирор ишидан нафратланса, сабр қилсин, чунки

хокимият итоатидан заррача чиққан киши жоҳилият давридаги (итоатсиз кишилар каби) ўлим топади!” дедилар».

Изоҳ: Бу ҳадисда бошлиқ ва раҳбарларга итоат қилиш лозимлиги айтиб ўтилмоқда. Ахли сунна вал жамоа эътиқодида раҳбар фосиқ бўлса ҳам, унга қарши чиқилмайди. Мусулмон раҳбарга қарши чиққанлар шариатда «боғий», яъни “ҳаддан ошувчи” деб аталади.

Аллоҳ Қуръонда бошлиқларга итоат қилишга амр қилиб: «Эй, имон келтирганлар! Аллоҳга итоат этингиз, Пайғамбарга ва ўзларингиздан (бўлмиш) бошлиқларга итоат этингиз!» деган. Шундай экан, ҳар бир мусулмоннинг раҳбарга итоат қилиши зиммасидаги вазифаси ҳисобланади.

Масъулият

40. Абдуллоҳ ибн Умар (розияллоҳу анху) ривоят қиласи: Расулуллоҳ (соллаллоҳу алайхи ва саллам) бундай дедилар: «Ҳар бирингиз раҳбарсиз ва ҳар бирингиз ўз қўл остингиздагиларга масъулсиз! Одамларга раҳбарлик қилувчи ҳам бошлиқ бўлиб, ўз қўл остидагиларга масъулдир. Эр эса ўз оила аъзоларига бошлиқ бўлиб, уларга масъулдир. Хотин ҳам Эрининг уйидагилар билан болаларига бош-

лик бўлиб, уларга масъулдир. Қул эса хўжайининг мол-мулкига ҳомий бўлиб, унга масъулдир. Демак, ҳар бирингиз бошлиқ бўлиб, ўз қўл остингиздагиларга масъулдирсиз!»

Изоҳ: Бу ҳадисда мусулмон киши, қайси дараҷада бўлишидан қатъи назар, қўл остидагилар борасида масъул экани баён қилинмоқда. Ислом худбинликка қарши. У нафақат ўзини, балки атрофидагиларни ҳам тўғри йўлга бошлашга, ёмонликдан қайтаришга масъулдир. Жамиятда ҳар бир киши ўз вазифасидан келиб чиқиб, ишига масъулият билан ёндошиши таъкидланмоқда. Кишилар ўз ишларини пухта, сифатли амалга ошириши зарур экани кўрсатилган.

Мундарижа

Имом Бухорийнинг ҳаёти ва илмий ижоди	3
Имом Бухорийнинг «Ал-Жомеъ Ас-саҳиҳ» асаридан 40 ҳадис	7
Ният	7
Йахши ишларга савобнинг кўпайтириб берилиши	8
Ислом арконлари	10
Бидъат рад этилади	11
Ҳалол ва ҳаром	11
Буйрукларни имкон қадар бажариш	13
Мол-мулк, жон ва обрў дахлсизлиги	14
Аллоҳ ёмон кўрган ишлар	15
Катта гуноҳлар	16
Мусулмон кишининг сифатлари	17
Кўшнига яхшилик	19
Ғазаб килма!	20
Йўлнинг ҳақи	21
Чин мусулмон	22
Савоблар тўла берилади	23
Одоб	24
Дараҳт экиш савоби	25
Расулуллоҳ (соллаллоҳу алайҳи ва саллам) хулқлари	26
Савобли ишлар	27
Аллоҳ мухаббатига сабаб амал	28
Илм	29
Олимларнинг ғанимат экани	31
Ислом осонлик дини	32
Ота-онага яхшилик қилиш	33
Бироннинг ота-онасини сўкиш ўз ота-онасини сўкиш билан баробар	34
Мехр кўрсатмаган меҳр кўрмайди	34
Кўшничилик	35
Йахши гумонда бўлиш	36
Ноҳақлик	37
Зулм	37
Ҳалол қасб қилиш	38
Ҳалоллик баракадир	39
Мунофикнинг сифатлари	39
Одамларнинг энг ёмони	40
Дўзах ахли сифати	41
Бойлик	42
Қаноат	43
Куфр иш	44
Раҳбарга итоат	44
Масъулият	45

Диний - маърифий нашр

ИМОМ БУХОРИЙДАН ҚИРҚ ҲАДИС

Муҳаррирлар:	Абдул Жалил ХЎЖАМ, Жамшид ШОДИЕВ
Бадиий муҳаррир:	Равшан МАЛИКОВ
Саҳифаловчи:	Комилжон МАҲМУДОВ
Мусаҳҳиҳа:	Нилуфар АБЛАЕВА

Нашриёт лицензия рақами: AI 146. 2009.14.08.
Босишга 2018 йил 11 августда рухсат этилди.

Офсет қофози. Қофоз бичими 84x108 ^{1/32}
Ҳарф гарнитураси PTSerif. Офсет босма усули.
Ҳисоб-нашриёт т.: 2,5 Шартли б. т. 1,5
Адади: 11000 нусха. 131-сон буюртма.
Баҳоси келишилган нархда.

“Movarounnahr” нашриётида тайёрланди.
Нашриёт манзили: 100002, Тошкент шаҳар
Зарқайнар 18-берккӯча 47а-үй.
Электрон почта: m-nashr@mail.ru.
Тел: (0-371) 227-34-30

“Муҳаррир нашриёти” МЧЖ босмахонасида босилди.
Манзил: Тошкент шаҳар, Чилонзор тумани 20А-мавзе
Сўгалли ота кўчаси, 5-үй.